

畿輔通志卷四

帝制紀四

詔諭四

嘉慶元年五月

諭朕此次巡幸熱河經過地方業經降旨將本年地丁錢糧蠲免十分之三但蹕路所經閱視沿途禾稼情形如順義縣屬之清河及密雲縣屬之石匣要亭一帶在地禾稼頗爲茂盛惟昨日經過之懷柔迤東在密雲附近地方地土稍乾田禾不能一律芃茂已據該督梁肯堂奏明將麥收較歉之處辦理平糶出借但現屆青黃不接之際小民口食尙恐不免拮据所有懷柔密雲兩縣所屬村莊內得雨較少麥收歉薄之處著加恩交該督查明蠲免本年地丁錢糧十分之五以示巡行施惠體恤民隱至意

嘉慶元年十月

諭前因張若淳成德審訊范光震呈控商總欺隱窩價一案所辦含混牽強特派軍機大臣會同該部提案另行審辦茲據軍機大臣查奏新派蘆商查善和查世廷楊秉鉞衛素昌等四人現運官引鹽觔經張若淳等先交新任鹽政變價入官業於沿途截留停運該州縣無鹽接濟有妨民食先行奏明請飭令照舊分運等語張若淳等辦理此事實屬大錯此項鹽觔均係分運各該州縣地方以濟民食今截留停運現屆冬令河道一經凍阻必致鹽觔不能運往小民有淡食之虞且鹽觔在途守凍船戶等必有偷賣等弊於商民均有不便張若淳等審辦此案當於鹽政運司有無請託賄囑情弊及商總等有無欺隱窩價審明方爲正辦而一切俱未能審訊明確於鹺務民食是否窒礙情形概置不問輒將新商等

所運鹽觔先行查抄變價以致沿途停運俾州縣無鹽接濟是何理耶况楊秉鉞卽使審明實有謀產減估情弊應行查抄治罪而於所運鹽觔亦應酌籌辦理且四商內惟楊秉鉞係被告之人其查善和查世廷衛素昌三人並無應得罪名乃亦一併議令變價入官更屬乖謬除已照軍機大臣所奏令該督撫鹽政等速行督飭沿途州縣將截留鹽船催令照舊分運毋誤民食外張若淳成德辦理此事實屬錯誤著先行交部嚴加議處俟軍機大臣等將本案詳審明確後再降諭旨

嘉慶元年十月

諭戶部尙書缺出昨因現在所有漢侍郎非新放卽人不相宜朕以張若淳係張廷玉之子范宜恒係范文程之後原欲於伊二人內簡擢一員以示眷念舊臣之意乃張若淳審辦天津鹽務一案於

方維甸阿林保與商人楊秉鉞有無情弊全未能審訊明確輒將楊秉鉞家產查封並將查善和各商等現運鹽觔一併變價卽令停運在途有妨民食所辦實大錯謬楊秉鉞應得罪名尙未訊究得實何得遽將伊家產查封卽或楊秉鉞果有謀產減估情事亦止罪坐該商何得波及查善和等三商將領運在途之鹽併行變價現在氣候漸寒若再稽延時日一經凍阻則各州縣地方無鹽接濟小民皆有淡食之虞現已令軍機大臣行知各該督撫鹽政卽飭各該地方官督率辦運商夥等速行照舊分運以資民食朕另降諭旨將該侍郎等交部嚴加議處張若淳似此辦事錯誤豈可復勝尙書之任所有戶部尙書員缺著范宜恆補授朕辦理庶務於臣工功過黜陟惟視其人之自取從不稍存成見將此通諭知之

嘉慶二年七月

諭內閣前據留京王大臣等奏七月初一日濃雲密布自辰刻微雨
霑灑時斷時續至初二日辰刻方止午後又有密雨一陣旋即開
霽等語而順天府尹及總管內務府大臣所奏亦屬相同熱河自
上月二十九日卽有陣雨至初一初二勢更滂沛直至初三日午
刻方止朕閱留京王大臣之奏方以爲京師雨勢小於熱河於田
功尙無妨礙及昨據梁肯堂奏永定河工次閏六月二十九日亥
刻起大雨如注初二日雨勢更急平地水深二尺以致永定河
埽工衝刷永定河頭二工段卽在盧溝橋附近距京不過二三十
里斷無與京城雨勢大小如此懸殊之理況本報屢次爲泥水耽
阻卽詢之齎送本報及由京前來熱河之人皆云是日京城之雨
甚大平地水深二三尺不等何以留京王大臣摺內尙稱斷續相

間初二日旋即開霽卽或因此時莊稼俱已長成高阜之處晴霽
後水勢全消尙無妨礙其低窪地方被淹甚少不致成災亦應將
此種情形詳晰奏聞何得意存粉飾在伊等之意以朕現在盼望
捷音經理軍務宵旰焦勞不復以此再煩朕念耳不知望捷音理
軍務乃朕分內之事而朕屢念雨暘民瘼更重於此也留京王大
臣等俱係朝廷大臣甯尙不能仰體朕意乎若似此互相隱飾則
封疆大吏從而效尤民隱無由上達是伊等欲慰朕懷其事小而
啟諱災捏飾之漸更重朕過所關甚鉅不可不示以懲創所有前
奏不實之留京王大臣順天府尹總管內務府大臣等俱著交部
議處仍著卽將京畿一帶田禾有無妨礙及低窪處所是否淹浸
之處據實速奏勿再諱飾干咎至在京科道均有稽察之責京師
雨勢過大而留京王大臣等並不據實具奏該科道何以亦無一

字奏聞均屬非是並著飭行將此通諭知之

嘉慶二年九月

諭梁肯堂奏查明被水州縣一摺直隸上年及今歲麥收俱極豐稔本年七月間秋雨較大永定河上游山水漲發以致下游附近之州縣間有被淹處所在地禾稼未免受傷若將各該屬應徵新舊錢糧仍照例一律徵收民力恐不無拮据所有被水成災之良鄉宛平通州寶坻武清霸州文安固安等八州縣著加恩將本年應徵民地錢糧蠲免十分之一其蠲剩錢糧分作二年帶徵應徵舊欠錢糧並旗租倉穀等項俱著加恩一體分作二年緩徵至涿州香河等二十二州縣低窪地畝亦間有積水豆穀收成未免少歉亦著一併加恩將涿州香河薊州三河東安永清保定清苑新城雄縣高陽蠡縣安州冀州衡水武邑甯晉隆平獻縣肅甯安平大

城等二十二州縣應徵民地錢糧並旗租倉穀等項均緩至來年
麥熟後徵收以紓民力該督務須督飭所屬實力奉行俾小民均
霑實惠毋使一夫失所以副朕軫念災區恩施無已至意

嘉慶四年二月

諭熱河承德府爲每年

太上皇考秋獮駐蹕之所該處民情素殷愛戴朕心深爲憐憫著將
承德府及所屬州縣併經過畿內之宛平順義懷柔密雲昌平等
州縣本年應徵錢糧全行蠲免至

陵寢一路將來奉移時應先期修墊道路該處百姓亦宜軫恤著將
大興三河通州薊州遵化州等州縣本年應徵錢糧暫行蠲免並
著直隸總督於接奉部文行知後速卽刊刻謄黃徧行粘貼曉諭
毋得仍前壓擱任聽不肖官吏私徵弊混庶恩膏下逮小民得霑

實惠該部卽遵諭行

嘉慶四年六月

諭軍機大臣等胡季堂奏直省懸欠各項請酌賞限期分別歸補其現任直隸各員應提集省城按限追繳至升遷外省已回旗籍者應行文各原籍及該管現任督撫將欠項各員提至省城管押等語胡季堂此奏祇爲追繳庫項懸款起見而不顧事理之難行且於各省吏治均有關係斷不可行直隸各州縣皆有地方之責若因立限追完欠項俱提至保定省城則本衙應辦刑名錢穀詞訟諸事勢必交佐雜及委員經理不特曠廢職守兼恐百弊叢生至回籍各員亦令本省督撫提集省城管押則各員在會垣株守更無從設法措交官項仍致日久懸宕於事何益若升遷外省之員或有才具明幹身膺繁劇爲上司所任用或有經手緊要事件該

督撫焉肯調駐省城置之空閒爲他省代追官項之理必致紛紛奏請仍回本任其事亦屬難行況胡季堂旣欲將升遷外省虧短直隸公項之員提至各省城拘管勒追其有虧短他省公項升遷直隸之員則各督撫亦必思倣照此奏行文胡季堂將各該員拘集省城是虧欠本省及他省官項各員皆須提集保定則直隸地方官之在本邑者寥寥矣若各省皆從而效尤則天下凡有應繳虧項各州縣必致一舉而空之試問國家會有此政體乎卽據單內所開不特州縣如巡撫馮光熊亦有攤賠之款豈欲將伊調至雲南省城令富綱追繳耶封疆大吏當以吏治民生爲重而財賦次之胡季堂何不知大體若此直隸未完各款已懸宕三十餘載旣須次第清釐何必亟亟現在各省懸項分別子孫代賠及前任現任三款已交戶部陸續查辦此單亦著戶部核明具奏候朕降

旨定奪至此時已提至保定各員仍著回任辦事

嘉慶四年八月

諭內閣江蘭奏護送官兵前往直隸拱極良鄉地方該營塘撥並無弁兵在汛而文武員弁亦無一員在彼護送等語各省設立塘汛額設弁兵原爲稽查奸匪緝拏盜賊護送差使理應一律整齊以壯觀瞻而嚴稽察今拱極良鄉二營近在輦轂之下尙且如此廢弛其餘各直省不問可知胡季堂卽日來京除俟伊到時將江蘭原摺交伊閱看令其據實查辦外並著通諭各省督撫提鎮等實力整飭稽查塘汛弁兵毋得仍前怠玩致干咎戾

嘉慶四年九月

諭本年春間因奉移

梓宮時經過地方均應先期修墊道路業經降旨將大興通州三河

薊州遵化五州縣本年應徵錢糧普行蠲免嗣又因直隸省自山海關至磁州有辦理過兵事務復降旨加恩蠲免錢糧十分之三內大興通州等五州縣卽係官兵經過之地業已疊霑恩澤今朕恭送

梓宮奉詣

山陵沿途地方親見黃童白叟跪列道旁瞻望

靈輿同深哀慕仰見

皇考六十餘年厚澤深仁淪肌浹髓凡有血氣莫不尊親且

大輦經過處所橋梁道路及朕經行御路均能修墊一律堅固平整民情亦極安靜又各該州縣本年曾有飛蝗前詢據胡季堂奏稱蝗蟲黃色者則能害稼黑色者並不爲害此次朕特令扈從侍衛等向道旁拾取親加閱看雖黑色者較多而黃色者甚少但既有

飛蝗莊稼豈能全無傷損恐胡季堂所奏究係地方官粉飾之言未可憑信除被蝗地方受傷輕重情形俟該督查明具奏候朕另行加恩外其大興通州三河薊州遵化五州縣著加恩再蠲免來年應徵錢糧十分之三以示錫惠推恩旁敷闡澤至意

嘉慶四年十月

諭內閣三法司具題直隸省秋審情實人犯招冊內該省原定緩決經刑部改擬情實者共有十起朕初閱時尙以胡季堂久任刑名於律例案情自所熟習或刑部改擬各起未必推求悉當及詳覈各案情節內如吳起善毆死于添錫一起于添錫因酒醉在吳起善門首向吳起善之子吳成索茶吳成未允彼此爭扭吳起善喝斥于添錫卽將吳起善揪住吳成遂扳倒于添錫吳起善順用斧背毆其右脇肋骨折其次子吳通亦幫同揪按該犯復連毆于添

錫左脇肋骨折吳成亦用石毆其顙門越十六日殞命父子三人同時逞兇傷至骨折斃命何得謂死者醉鬧傷係他物入於緩決又如李三毆死高扣兒一起李三之女許與高扣兒童養爲妻李氏歸甯未回高扣兒往接以霸留在在家之言向李三觸犯李三喝斥因高扣兒詈罵遂取鑱刀向砍致傷高扣兒鼻準高扣兒混罵該犯復用刀連砍傷其頷頰上下脣吻並砍落牙齒情節已屬兇橫甚至頓起殺機很砍高扣兒右太陽用力拔刀致鑱刀斷入骨內立時殞命死者卽屬總麻卑幼不以凡論但秋審原情定獄此案逞忿故殺刀斷骨內實屬兇殘該督旣稱殺出有心何以捨故殺專條遽入緩決他如倚眾攢毆及窩匪拒捕致傷事主成廢並強爭祖妾養老田畝刃斃其命等案皆係恃強逞兇窩盜藐法應入情實之犯原題概擬入緩決殊失情法之平秋讞大典惟當覈

案揆情固不得有意從嚴過爲刻覈然心存寬縱故出人死罪以爲好善陰功及涉於窺測揣度之私者皆令死者含冤於地下則所謂明允者謂何豈不於止辟之義大相刺謬耶在他人猶可諉之不諳律例胡季堂素習刑名乃於秋審案件並不覈實持平妄意揣測豫存成見竟染外省習氣殊屬非是所有原題之總督胡季堂及升任臬司全保俱著交部分別議處

嘉慶四年十一月

諭戶部核議直隸通省虧欠攤賠各款分限完交一摺倉庫錢糧均關國帑豈容任意懸欠今直隸一省自乾隆三十二年以後未清銀款至一百四十四萬餘兩歷任各官至一百三十九員之多此等虧欠帑項之員本應按照定例分別治罪監追惟念歷時已久人數過多是以前此胡季堂奏請將各員提集省城追繳當經降

旨以各省官員眾多俱行提集省會殊非政體因將胡季堂奏到原單交部查辦茲據查明分別開單呈覽除不知存歿各員查明另辦外所有現任虧欠各員其銀數在一千兩以下者限半年追完一千兩以上至五千兩者限一年追完一萬兩者限二年追完二萬兩者限三年追完三萬兩者限四年追完三萬以上者限五年追完此內虧欠不及一萬兩之員著革職從寬留任已回旗籍者著革職暫留頂戴若限內全完准其開復其數逾一萬兩之員著革職卽離任已回旗籍者亦著革職按限著追如限內全完奏明請旨此係朕格外施恩將應行治罪各員於無可寬貸之中免其治罪該員具有天良自應將虧欠銀兩依限措交若再逾限不完斷難曲宥必當照新例將各該員監禁嚴追矣至攤賠各員與本身虧欠者尙屬有間除現存之員照戶部定例按限追交外已

故人員著照前次恩旨一千兩以下者全行寬免一千兩以上者免十分之五二千兩以上者免十分之三此皆因直隸一省差務繁多數倍他省地方官平日經理不善或有借墊等項不能及時歸款以致日久拖延人數過多故加恩特從寬典若他省並無差務可以藉口倉儲庫項皆當核實清釐豈容稍有虧欠如有查出虧短帑項人員必當按例嚴懲不得援照直隸之例妄希寬辦也餘著照所議行

嘉慶四年十一月

諭現屆長至

園丘大祀

高宗純皇帝

升配禮成後自應仰推